

六月二十，美國東部及西部台僑發動一個「阿扁加油，台灣加油」結黃絲仔帶活動，ma7發表聲明表達對台灣政局e5憂心。In講阿扁「一再受屈辱食苦」，那像家己hong5侮辱、家己teh食苦。抗議阿扁hong5關兩百工，向望阿扁會tang3早一日得tioh8釋放、轉去厝裡團圓。In對馬政府「無管國內外理性善意e5呼籲，繼續追殺政敵，拆裂台灣」，用結黃絲仔帶表達上沉痛e5無言抗議。

台灣國家聯盟總召集人姚嘉文、台獨聯盟主席黃昭堂、台教會會長陳儀深等社團代表，會同民進黨黨團書記長高志鵬召開記者會，共同宣布發起結黃絲仔帶行動。為抗議扁案等司法案件審判不公，七月初九發起「堅持公平審判，全民捍衛人權 - 全民結黃絲仔帶」活動，呼籲民眾ti7七月十二下晡兩點，佇全台灣各縣市政府、司法機關、抑是鬧熱所在結黃絲仔帶，要求馬政府隨時停止變弄司法。社團代表ui3七月初九開始結黃絲仔帶。台北市規劃七月十二下晡兩點開始，ui3台北看守所一直到台北市二二八公園沿路攏beh結黃絲仔帶，hit暗佇二二八公園舉辦黃絲仔帶祈福晚會。

咱攏知，日本政府殖民統治台灣e5時，對任何嫌犯拘留be7使超過一個月，所以hit當時e5人攏知影「拘留二九工」chit句話。中國國民黨政府無必要一直ka7阿扁前總統拘留到二百九十工，來證明in chit -e5殖民統治政府，比日本政府hit -e5殖民統治者au3十倍、垃圾十倍、可惡十倍。Ka7阿扁前總統拘留超過二九工，咱就知影中國國民黨殖民政府比日本殖民政府koh khah差！

黃絲仔帶e5由來是按呢：一九七一年，美國有一個查甫人刑期滿了出獄，坐巴士beh轉去厝裡e5途中佇車頂講出伊e5心境。伊teh beh出獄進前有寫一張批hou7伊e5牽手。批寫講，若beh原諒我，請佇咱厝前hit欉老樹頂面結一條黃絲仔帶，我看tioh8就會落車轉厝。假使我若無看tioh8黃絲仔帶，表示你無beh原諒我，我無怨歎，我會繼續坐巴士離開故鄉。「Teh beh到厝ah！我實在緊張kah m7敢看。若看tioh8黃絲仔帶就代表我會tang3轉去厝裡，黃絲仔帶才是真正hou7我得tioh8自由e5鎖匙。司機ah，拜託你替我看。」歸車e5旅客攏替伊大歡喜！m7是一條，是歸百條e5黃絲仔帶結佇hit欉老樹頂面。

聲援阿扁前總統e5人無人講伊有罪抑是無罪。In e5想法真單純：伊若有罪，ka7起訴、ka7判罪、hou7伊去坐監；伊若無罪就緊ka7放。TaN用chit種au3步掠人關人，無gau5啦！咱結黃絲仔帶m7但是抗議烏白拘留人，koh khah是beh送溫暖hou7阿扁仔前總統：阮歡迎你轉來！